

Kata Pengalo – Ngalo Ras Momo

=====

Turang ras senina i bas Tuhanta Jesus Kristus, selaku serayan Tuhan, ikataken kami mejuah-juah ras Selamat Wari Minggu man banta kerina. Man bandu kekelengen kami si sekali enda denga erkebaktin i bas gerejanta enda, ikataken kami mejuah-juah. Kerehenndu nambahi keriahen man banta kerina. I bas bena kebaktinta mari dage sidengkehken momo kerna perdalanen perpulungen Tuhan bage pe rencana pelayanen gerejanta ku bas wari-wari si reh enda ([Ngogeken Momo](#)).

Kata Penaruh

=====

Turang ras senina, ermengkah ukurta dengen sikataken bujur man Dibata si jadi usihen orat nggeluh man banta. Biak Dibatanta e la erngadi-ngadi ngukurken dengen erbahan si mehuli nandangi doni enda. ItepaNa kita sentudu ras tempasNa, dengen iaturken doni enda i bas kiniulin seh maka sikap kal jadi inganta ras-ras ndalani kegeluhen. Biak Dibata eme jadi biakta guna njagai, ngukurken ras maba kiniulin nandangi doni enda. Arah kebaktinta enda, ate Dibata empersingeti kita ulihi kerna orat nggeluh, gelah kita encidahken budaya nggeluh si mehuli, subuk i bas cara rukur, pengerana ras perbahanen si bali ras biak Dibata.

Erkata Lonceng

(Perp. Tedis)

Rende

KEE No. 372 : 1, 2, 3 *(Serayan Kebaktin Bengket Ku Mimbar)*

Kebaktin Minggu, 19 Juli 2026
Minggu VII Kenca Trinitatis / Minggu Budaya I

3	Votum – Salam <i>(Perp. Tedis)</i>
L	I bas gelar Dibata Bapa si jadi ulu orat nggeluh, i bas gelar Jesus Kristus si jadi usihen geluh manusia, ras i bas gelar Kesah si Badia si mereken kepentaren guna mbangun kegeluhen si mulia. Perkuah ate ras dame i bas Dibata Bapa, AnakNa Jesus Kristus, ras i bas kerembaken Kesah si Badia ras kita kerina gelah. Amin.
P	Amin Amin Amin <i>(iendeken)</i>
4	Berita Kerna Sura-Sura Ras Perbahanen Dibata (Invocatio)
L	“Kai si enggo idah kami dengen ibegi kami e, iberitaken kami man bandu pe gelah kam ikut ras kami ersada ras Bapa dengen ras AnakNa Jesus Kristus” (1 Johanes 1 : 3). Erpalasken Kata Dibata enda, sipuji IA alu ras kita ngendeken : KEE No. 399 : 1, 2, 3
5	Pujin Man Dibata Si Jadi Usihen Orat Geluhta <i>(Perp. Kundul)</i>
L	Dibatanta nuduhken uga orat nggeluh simehuli man manusia, si teridah arah rencana ras perbahanenNa. Tuhan, enggo nepa doni enda alu mehuli, seh kal ulina. IpesikapNa doni si rontang jadi mehuli. IaturkenNa pe perdalanen wari, suari ras berngi. ItepaNa sinuan, rubia ras pe manusia. Ibahan Dibata doni enda metunggun kal jadi inganta nggeluh alu mehuli. Lebih asa si e, itepa Dibata kita tudu ras tempasNa, dengen idiloNa pe kita jadi temanNa pekena-kena doni enda. La ipelepas Dibata manusia nggeluh sisada-sisada. IjujurkeNa man manusia teman nggeluh dengen kade-kade, gelah lit inganta nehken keleng ate, nuri-nuri ras megie-megie. Gelah lit ingan manusia nampati ras pe sinampati. Andiko seh kel ulina perukuren Dibata. Emaka Pujilah Tuhan! Pujilah IA erkiteken perbahanenNa si mehuli. Pujilah Tuhan erkiteken enggo ituduhkenNa orat nggeluh simehuli. Tetapkenlah i bas ukurta maka kidekah kita nggeluh la kita lupa perbahanen Dibata man banta. Turikenlah dengen ajarkenlah e man anak-anakta, ras man kempu-kempunta, gelah turah i bas ia biak nggeluh si mehuli.

P	Ikataken kami bujur man baNdu Tuhan, nandangi perukuren ras perbahanenNdu, si erbahan geluh kami mehuli, sabab eme jadi usihen orat nggeluh man kami.
L	Sipuji Tuhanta alu ras kita rende i bas : KEE No. 306 : 1, 2, 3, 4
6	Kinilangasupen Manusia Nggeluh i Bas Perukuren Dibata
L	O turang ras senina, enggo ituduhkan Dibata orat nggeluh si mehuli man banta, alu nepa kita mulia dengen mehaga. Adi sisiksiki pusuh mukurta, enggo nge ndia perukuren Dibata e singkuasai perukurenta ? <i>(Paksa Teneng)</i>
L	O turang ras senina, adi Dibatanta la engadi-ngadi ngukurken si mehuli nandangi kegeluhenta, kuga nge ndia ketutusenta njagai dirinta gelah kita tetap ngukurken si mehuli man temanta manusia ? <i>(Paksa Teneng)</i>
L	Mari tole siakuken salah lepakta man Dibata i bas ende-enden : KEE No. 76 : 1, 2, 3
7	Berita Pengalemi Dosa <i>(Perp. Tedis)</i>
L	Tuhan e perkuah dengen perkeleng kap, la pedas IA merawa. IA dem alu keleng ate si tetap. Labo kita iukumNa sue ras dosanta, labo IA erbalas man banta sue ras kesalahenta. Emaka, selaku persuruhan Dibata aku nehken kataNa man banta kerina si ngakuken dosa ras kesalahenna, dengen jera i bas dosa ras kesalahenta nari, niNa : <i>“Bali ras ganjangna langit i babo doni nari, bage kal me belinna keleng ateNa man kalak si erkemalangen baNa. Bagi dauhna kepultaken arah kesunduten, bage me ipedauhNa dosa-dosanta i bas kita nari. Bagi keleng ate bapa man anak-anakna, bage kal me pengkelengi Dibata kalak si erkemalangen man baNa”</i> <i>(Masmur 103 : 8 – 13).</i> Sipuji Tuhan erkiteken dosanta enggo ialemiNa alu ngendeken : KEE No. 454 : 1, 2, 3

8	Kata Dibata <i>(Perp. Kundul)</i>
a 9:19 L 9:20 P 9:21 L 9:22 P 9:23 L	Marilah sibegiken Kata Dibata si man ogenken ibas Minggu enda sini ibuat ibas Kitab 1 Korinti 9 : 19 - 23. Mari siogeken secara pegancih. Sibenaken pengogenta Aku bebas nge; aku labo budak ise pe. Tapi kujadikan diringku jadi budak nandangi kerina jelma gelah banci nterem kalak dat aku guna Kristus. Nandangi kalak Jahudi bagi kalak Jahudi aku guna ndatken kalak Jahudi. Bagi ia patuh man Undang-undang Musa, aku pe patuh man Undang-undang e, gelah banci ia dat aku, aminna pe aku labo i teruh Undang-undang e. Bage me pe nandangi kalak si la lit i bas ia Undang-undang Musa, bagi ia e ka aku, gelah banci ia dat aku. Si enda labo nuduhkan maka la aku i teruh Undang-undang Dibata, sabap si tuhuna aku i teruh Undang-undang Kristus. Nandangi kalak si merampek kinitekenna, bagi ia e ka aku, gelah kudat ia. Aku enggo jadi bali ras kerina kalak rikutken paksana gelah banci deba-deba ia kuselamatkan alu kerina dalam si payo. Si enda kerina kubahan guna Berita Si Meriah, gelah aku pe dat bagin subuk i bas dahin bage pe i bas pasu-pasu Berita Si Meriah e.
	Ketuahen kalak si megiken Kata Dibata, dingen si makekenca i bas geluhna si teptep wari, Haleluya. Ialoi perpulungen alu ngendeken : <i>Halehuya</i> <i>Halehuya</i> <i>Halehuya</i>

b	Ertoto guna Khotbah
c	Khotbah : Masmur 104 : 24 - 30. Tema : “IjadikenNa Alu Dem Kepentaren”
d	Ertoto kenca khotbah
9	Pengakun Kiniteken <i>(Perp. Tedis)</i>
	Aku tek man Dibata Bapa si la ersibar kuasaNa, si nepa langit ras doni. Aku tek man Yesus Kristus anakNa si Tonggal Tuhanta, si jadi arah Kesah si Badia, tubuh i dur singuda-nguda nari si so keliamen, tergelar si Maria, si ngenanami kiniseran sangana pemerintahen Pontius Pilatus, nipakuken ku kayu persilang, mate je nari ikuburken, nusur ku doni kematen, peteluwariken enggo keke ibas si mate nari, nangkih ku surga, perkundulna arah kemuhen Dibata Bapa si la ersibar KuasaNa, je nari reh me IA pagi ngeranaken si nggeluh ras si enggo mate. Aku tek man Kesah si Badia, janah lit sada Gereja si Badia, persadan kalak si Badia, pengalemi dosa, kinikeken kula, kegeluhen si rasa lalap. Amin.
10	Persembahen <i>(Perp. Kundul)</i>
L	Dibata enggo nuduhken orat nggeluh si mehuli, si erbahan kegeluhen doni jadi mehuli. Guna nginget ras ngergaken kiniulin Dibatanta e : <i>“O senina-seninangku, nginget perkuah ate Dibata si mbelin si isehkenNa man banta, kupindo man bandu: Endeskenlah kulandu man Dibata saja selaku persembahen si nggeluh rikutken si ngena ateNa. Sabap bage me arusna kam ersembah man Dibata sue ras biakndu selaku mahluk si rukur” (Roma 12 : 1).</i> Tupung sisehken persembahen, ras kita rende i bas : KEE No. 405 : 1, 2, 3 Pertoton Persembahen ras Syafaat
11	Perpadanen Man Dibata <i>(Perp. Tedis)</i>
L	Turang ras senina, enggo itepa Dibata kegeluhen doni alu mehuli, ipekenana kita i bas orat nggeluh si erkawiten sada ras sidebanna.

P	O Tuhan, erpadan aku nggeluh i bas perukuren Kristus, si njaga kiniulin geluh si enggo iaturkenNdu.
L	Dibata ngkuhi kita alu kepentaren guna nuduhken orat nggeluh bagi IA. Nggit nge kita nggeluh bagi biak Dibata si ngukurken si mehuli man doni enda ?
P	O Tuhan, erpadan aku nggeluh njagai dingen jadi usihen, nuduhken orat nggeluh si mehuli. Kupelimbarui me diringku, gelah reh pentarna aku encibalken kekelengen nandangi temanku ras tinepaNdu sideban.
L	Mari sipeteguhi perpadanenta man Dibata alu ras kita rende i bas : KEE No. 381 : 1, 2, 3
12	Pertoton Tuhan
13	Pengutusen ras Pasu-pasu Dibata
L	Kekelengen ni Tuhan, berkatlah ndalani geluhndu si meherga i adep-adepen Dibata alu tetap nehken kekelengen dingen kehamaten nandangi kerina tinepaNa. Emaka jadi gegehndu, alokenlah pasu-pasu idur Dibata nari : <i>“Ipasu-pasu janah ikawali Dibata kam, siang ayo Dibata ersinalsal ibabondu, janah melias ateNa ngenehen kam. Itatap Dibata ku kam, janah malem atendu ibahanNa.” Amin.</i>
	Ialoi perpulungen alu ngendeken : A..min A....min Amin
	<i>SELAMAT HARI MINGGU/SYALOOM.....</i>